

Il lung 19avel tschientaner en Svizra (Part 3: societad)

■ En il decurs dal 19avel tschientaner è l'urden social e politic, stabil dapi tschientaners, i en decadenza ed ha fatg plaz a la societad moderna che s'orientescha tenor ils ideals da la democrazia e dals dretgs umans. Questa via è dentant stada lunga e spinusa. Sur lung temp ha la burgaisia furmà l'elita politica ed economica dal stadi, entant che las relaziuns da viver da grondas parts da la populaziun eran segnadas da stgarsezza materiala. Cun introducir la scola obligatorica e cun relaschar leschas da lavurers e socialas ha il stadi provà da far frunt a questas inegalitads. L'istorgia sociala dal 19avel tschientaner è dentant er segnada d'ondas d'immigraziun e d'emigraziun. Anc en il 18avel tschientaner durava in viadi da la Svizra en l'America plirs mais; enturn il 1900 pudevan ins far quest viadi vi surmar en 10 dis. Il barat da rauba ha cuntanschì dimensiuns enormas. Ins ha importà da tut il mund betg mo spezarias ed objects da luxus, mabain er artigels per il diever quotidian. Mercenaris, perscrutaders, missiunaris e commerziants da la Svizra èn viagiads per tut il mund. Da l'autra vart è il pajais daven-
tata in lieu da scuntrada per esters ch'èn immigrads sco fugitivs, turists e commerziants.



ta in lieu da scuntrada per esters ch'èn immigrads sco fugitivs, turists e commerziants.

Vita burgaisa

Ina clera separaziun da la sfera publica e privata appartegnava als principis fundamentals da la societad en il 19avel tschientaner. La vita activa en la publicitad era da princip resalvada a l'um. La dunna sa participava mo a moda passiva – sco aspectatura u accompagnadra. La vita famigliara era percenter sia domena. Consequentmain è il dachasa intim vegnì furmà sco lieu da refugì dal trasvasch confus dal mund. Perdita da quei dattan mobiglias e decoraziuns che duevan intermediar in'atmosfera empernaivla ed intimitad. La vita burgaisa è passada en in equiliber da lavur e divertiment, da prestaziun e paus controllà minuziusamain. L'urden che regiva sin tuts secturs, latiers nettezza, lavurusadad e punctualitad eran las virtids burgaisas principalas che caracterisavan il mintga di.

Quest ideal da la vita burgaisa era dentant resalvà ad ina pitschna minoritad da la populaziun. Mo en ina classa bainstanta da las citads pudevan las dunnas sa deditgar entirmain a lur pensums da chasa e desister d'ina lavur pajada. Il stil ideal da viver dals burgais valeva en il 19avel tschientaner per maximal il ventgavel da la populaziun – per l'elita politica ed economica dal pajais. Nagliur



Scola dal vitg l'onn 1848 (Albert Anker 1896).

en l'Europa è il triumf da la burgaisia e da sias furmas socialas stà uschè radical sco en Svizra, nua che la noblezza giugava mo ina rolla marginala.

Ma las normas da la vita burgaisa èn vegnidas surpigliadas da la gronda part da la populaziun. Numerusas famiglias da la classa mesauna sa devan fadia – cun bun u mender success – da cuntanscher questas normas da la burgaisia.

La naziun en stanza da scola

Sin l'instrucziun en scola giaschevan bleras speranzas: Ella dueva crear ina nova generaziun ch'era pronta d'acceptar las sfidas economicas, politicas e moralas dal temp modern. La Constituziun federala dal 1874 ha pretendì che tuts chantuns stabileschian scolas primaras obligatorias, gratuitas ed independents da la baselgia ed avertas per tuts uffants. L'organisaziun da questas scolas era chausa dals chantuns che vegliavan schigliusamain sur da lur independenza. Vers la fin dal tschientaner è l'analfabetissem alura er svani dal tutfatg. La lavur d'uffants en las fabricas è vegnida scumandada cun la Lescha davart las fabricas da 1877; autras pussaivladads d'occupaziun èn vegnidas limitadas rigurusamain e regulamentadas. L'uffanza ed il temp da giuventetgna valevan per uss ed adina sco temp da scolaziun.

Leger e scriver, quintar e religiun furmavan la basa da l'instrucziun. En il davos terz dal 19avel tschientaner è questa basa vegnida schlargiada: l'istorgia, la geografia e conuschientschas litteraras e scientificas èn daventadas materias d'instrucziun. Latiers dueva la scola er intermediar las virtids burgaisas sco urden, nettezza e sentiment da responsabladad. La scolaziun da magistras e magisters è daventada in pensum impurtant ch'è

vegni confidà als seminaris da magisters ch'èn vegnids fundads dapertut.


Scolas secundaras eran l'emprim da chattar sco scolas privatas ed a partir da la mesadad dal 19avel tschientaner er sco scolas publicas. La scolaziun pli intensiva en linguas e scienzas ha preparà ils scolars per las pretensiuns da las numerusas professiuns novas e per las scolas medias.

Igiena e sanadad

Avant l'Emprima Guerra mundiala dumbrava la Svizra pli che trais milliuns abitants, da quels eran circa 500 000 esters. Dapi l'onn 1800 eran pli che 300 000 Svizras e Svizzers emigrads, ma dapi plirs onns surpassava il dumber dals immigrants lunschor quel dals emigrants. Grazia a las mesiras igienicas e medicinalas è surtut la mortalitad dals uffants sa sminuida, ma er il dumber da las naschientschas è sa reduci cuntinudamain.

Il progress da la medischna e da la scienza han midà cumpletmain la tenuta fundamentala vers la sanadad e la malsogna. La malsogna n'era uss betg pli ina prova tramessa da Dieu, mabain in mal al qual igl era da prevegnir e che stueva vegnir cumbattì. Mintgin e mintgina era per la gronda part sez/sezza responsabel/bla per sia sanadad. Il medi sco possessur da las enconuschientschas scientificas è daventà il nov erox dal progress. Ils ospitals ch'eran a l'entschatta dal 19avel tschientaner anc instituziuns da beneficenza, avertas per tuts disfortunads, èn uss daventads lieus spezialisads per cumbatter las malsognas. Sco la medischna è sa dividida en novs secturs spezialis, uschia èn vegnids creads novs instituts spezialis: clinicas, chasas per malsaus da spiert, sanatoris e chasas da tgira.

Cun la scuverta da las vias da transmissiun da malsognas contagiusas e lur scherms infectus èn er sa derasadas las mesiras igienicas correspudentas. La nettezza en tut ils secturs da la vita era dapli che mo ina prescripziun medicinala: ella è daventada ina virtid burgaisa.



Henry Dunant (1828–1910), il fundatur da la Crusch cotschna.

Siemis d'in meglier mund

Il 20avel tschientaner ch'ha purtà en ses decurs guerras ed orrurs da dimensiuns nunimaginablas, ha cumenzà cun la speranza d'in meglier mund. Novas ideas filosoficas tschertgavan d'avrir dimensiuns dal pensar e da la sensibilitad fin uss betg conuschentas. Empè da sa referir sco fin uss a l'istorgia, èn ins sa laschads manar da la psicologia e da l'antropologia per tschertgar ina vardad ed ina bellezza pli elementara e comunabla per l'entira umanitad. Questa debatta intellectuala ha chattà ses resun en tutas domenas da l'art. Qua ha gi lieu in lutga vementa tranter la tradiziun e l'avantgarda ch'ha marcà profundamain la fasa da transiziun dal 19avel al 20avel tschientaner.

La Svizra è stada in terren fritgaivel per da tutas sorts moviments filosofics, artistic ed umanitar. Sco republica cun ina tradiziun liberala e toleranta è ella daventada il lieu preferì per numerus congress e la sedia d'organisaziuns internaziunalas. En emprima lingia è la Svizra daventada il lieu da scuntrada dals umens e da las dunnas ch'auzavan lur vusch en tut il mund cunter la guerra e la miseria da l'umanitad. Uschia è la Crusch cotschna vegnida fundada a Geneva l'onn 1864; ella ha muntà l'emprima prova d'assistar a las victimas da la guerra e tut ils pajais dal mund tras con-

tracts internaziunals. Las orrurs da l'Emprima Guerra mundiala han mussà ina giada dapli che la pasch è in'incumbensa da l'entira umanitad. En quest senn è vegnida fundada l'onn 1919 la Societad da las naziuns che ha fixà Geneva per sia sedia.

Viagiators e turists

Tschientmillis d'emigrants svizzers han chattà en il 19avel tschientaner ina nova patria vi surmar. Dapi la midada dal tschientaner è la Svizra daventada in pajais d'immigraziun; l'expansiun da l'industria e dal commerzi ha clamà forzas da lavur da l'exteriur.

Dapi il 18avel tschientaner ha la Svizra retschet mintga stad numerus turists. Els vegnivan per admirar las bellezgas da la natira. En lur mez viveva in pievel apparentamain ventiraivel e liber ch'era restà preservà da la decadenza da la civilisaziun moderna. En questa vista exaltada ed idealisada parevan las muntognas sco simbols da la libertad e da la pasch.

L'emprima unda da turists era limitada sin ina pitschna gruppa da persunas privilegiadas che possedeava daners e temp avunda per viadis da scolaziun e recreaziun. L'emprima finamira centrala da viadi è stà il Lai da Geneva, pli tard èn ils giasts penetrads en las valladas da las Alps pli e pli periferas. Il 19avel tschientaner è daventà l'epoca da las

prestaziuns alpinisticas gloriusas en Svizra; bunamain mintga stagiun ha purtà novas emprimas ascensiuns tras alpinists englais u svizzers.

Da la mesadad dal tschientaner davent è il dumber dals turists s'augmentà massivamain. Ils burgais bainstants èn suandads l'exempel dals viaggiators aristocrats. La construcziun da novas vias, la viafier ed ina infrastruttura d'hotels ed albierts ch'è s'extendida spertamain han facilità il viaggiar en las Alps. Il turissem è sa sviluppà ad ina vaira industria; fin il 1900 è il dumber dals giasts annuals s'augmentà sin radund 350 000.

Da quest temp ha il turissem gia conquistà ina nova domena. Entant ch'ils giasts vegnivan fin uss quasi mo durant la stad, èn uss arrivads blers giasts per far sport d'enviern en las muntognas. Er qua èsi stà ils giasts englais ch'han laschà enavos ils emprims fastizs, ma ils indigens èn medemamain daventads en curt temp sportists d'enviern entusiasmdas.

La preschentaziun:

Dossier «Il lung 19avel tschientaner en Svizra».

Dapli infurmaziuns:

chatta.ch/?hiid=2785
www.chattà.ch



Il turissem prenda possess da las Alps (carta postale, ca. 1900).